

Skýrsla Betadeildar 2010 – 2011

Betadeild er önnur elsta deild samtakanna á Íslandi en hún var stofnuð 2. júní 1977. Deildin er skipuð konum á Norðurlandi eystra. Flestar félagskonur eru búsettar á Akureyri en einnig eru konur frá Húsavík og úr Eyjafjarðarsveit. Í dag eru Betasystur 27 og hefur stefnan undanfarið verið að fá ungar konur til liðs við okkur. Í dag er aldursbil Betasystra nokkuð breitt en sú elsta er fædd árið 1929 en sú yngsta 1971. Betasystur hlúa hver að annarri og eru ætíð reiðubúnar að styðja hver aðra ef á þarf að halda.

Nýtt starfsár hófst með nýrri stjórn og var fyrsti fundur vetrarins haldinn í september á Möðruvöllum í Hörgárdal þar sem séra Sólveig Lára tók á móti okkur, gekk með okkur um svæðið og sagði okkur sögu kirkjunnar og staðarins. Þetta var afar fræðandi og margt sem við ekki vissum. Að þessu loknu fengum við inni með fundinn okkar í svokölluðu „Leikhúsi“ en það er nýuppgert leikfimihús á staðnum. Eftir það gæddum við okkur á dýrindis fiskisúpu og súkkulaðiköku á eftir sem staðarhaldarar sáu um. Á þeim fundi kom stjórnin með þá hugmynd að þema vetrarins yrði 6. markmið DKG sem er „að efla persónulegan og faglegan þroska félagskvenna og hvetja þær til virkni“ auk þess að horfa inn á við og efla félagsþroska.



Á októberfundinum sá stjórnin um fræðslu um DKG og urðu miklar og skemmtilegar umræður um starf samtakanna á alþjóðavísu og innanlands. Konur höfðu á orði að margt hafi komið þarna fram sem þær vissu ekki, sérstaklega þær konur sem hafa verið styst í deildinni. Út frá þessu var svo ákveðið að vinna meira með það sem kom fram í umræðunum og ákveðið að gera það á febrúarfundinum.

Á jólafundinn að þessu sinni kom Anna María Sigurðardóttir sem búsett er í Hrísey og rifjaði upp spennandi ár úr barnæsku sinni en hún bjó á ýmsum framandi stöðum sem barn og unglingur. Hún sagði okkur frá því sem tengdist jólum í hennar uppeldi. Anna María bjó meðal annars á Mauritius, Malaví, Róm, Indónesíu og Flórída. Fjölskyldan hélt í íslenska jólasíði og venjur, hvort sem hún bjó heima eða erlendis en í þeim löndum sem Anna María bjó í bjuggu hindúar, múslimar og kristnir. Frásögn hennar vakti upp margar spurningar sem hún svarði um hæl.



Bókafundurinn var að venju haldinn í heimahúsi í janúar. Þar ræddu konur bækur sem hafa haft áhrif á þær og þær mæla með fyrir aðrar konur að lesa. Ákveðið var að fyrir marsfundinn sem er árlegur leshringsfundur yrðu bækurnar *Ljósa* eftir Kristínu Steinsdóttur og bókina *Morgnar í Jenín* eftir Susan Abulhawa. Listi með bókum sem kynntar voru á fundinum er settur á síðu deildarinnar. Á þessum fundi voru samþykktir sex nýir félagar sem boðnir yrðu á næsta fund.

Í febrúar var framhaldsfundur frá október og þá var haldið áfram að vinna með hugmyndir okkar um DKG. Fundarkonur var skipt upp í nokkra hópa og settar upp spurningar sem hóparnir áttu að velta fyrir sér í sameiningu. Spurningarnar voru t.d. *Hvaða væntingar höfum við til DKG í dag og hvað getum við lagt af mörkum til DKG?* Fundarkonur voru sammála um að skemmtileg umræða hafi skapast. Gestur á þessum fundi var Ingibjörg Jónasdóttir Landssambandsforseti. Fyrirhugað er að nota niðurstöðurnar til að móta starfið næsta vetur.



Á öllum fundunum voru fastir liðir eins og happdrætti þar sem sá sem fær vinninginn kemur með næsta vinning. Veitingar eru á sínum stað og konur láta alltaf litla upphæð af hendi rakna í þeim tilgangi að safna fé til styrktar stúlkum í Afríku. Árlega er UNICEF færður sjóðurinn. Mæting Betakvenna á fundi í vetur hefur verið nokkuð góð eða milli 17 og 20 konur á hverjum fundi og þeim sem boðið var að ganga í deildina eru að hugsa sig um. Auk starfa fyrir deildina hafa Betasystur einnig tekið virkan þátt í starfinu á landsvísu. Ingibjörg Auðunsdóttir starfar sem ritari landssambandsstjórnar og Anna Þóra Baldursdóttir starfar með stjórn sem fráfaramandi landsambandsforseti og ekki má gleyma henni Eygló okkar sem er vefstjóri deildarinnar og gegnir jafnframt starfi sem vefstjóri landssambandsins og European Forum. Myndir frá starfi deildarinnar má finna á vef deildarinnar. Þær Þórunn Bergsdóttir, Jónína Hauksdóttir og Guðrún H. Björnsdóttir sitja í fjárhagsnefnd.

Í apríl er fyrirhugað að fara saman á einhvern menningarviðburð og auk þess er Beta konum boðið á stofnfund nýrrar deildar á Norðurlandi.

Sú hefð hefur skapast að halda lokafundi deildarinnar, sem jafnframt eru aðalfundir annað hvert ár, í heimahúsi. Ekki er búið að ákveða hvar hann verður í ár. Á lokafundum hefur skapast sú hefð að gera sér sérstaklega glaðan dag og borða saman hátíðarmáltíð. Konur skipta með sér að koma með veitingar sem borðin svigna undan.

Ein Betasystir ákvað að yfirgefa deildina vegna anna.

Núverandi stjórn deildarinnar skipa þær:
Þorgerður Sigurðardóttir formaður
Jónína Hauksdóttir varaformaður
Þórunn Bergsdóttir ritari
Hanna Salómonsdóttir meðstjórnandi
Sigrún Aðalgeirsdóttir gjaldkeri.
Með stjórnunum hafa starfað fráfarandi formenn.

Fyrir hönd Betadeildar
Þorgerður Sigurðardóttir formaður